

Drakensbergtoer: Kiepersol Streek

25 Oktober 2014 - 09 November 2014

Die toerlede het mekaar op Saterdag 25 Oktober 2014 om 09:00 by die vulstasie tussen Alberton en Heidelberg ontmoet. Die toer het bestaan uit 14 woonwaens en 29 toerlede. Twee-en-twintig toerlede is lid van Sawa, terwyl twee gesinne vriende van Sawa-lede was. Daarbenewens het 'n Algerynse vriend van Jannie van den Berg ook die toer meegemaak.

Weens die stywe toerprogram aan die begin moes ons Saterdag 25 Oktober deurdruk na Midmardam buite Howick. Op Sondag 26 Oktober was die gedagte om by die Karkloofwaterval in die Karkloofvallei digby Howick te gaan braai. Die reënweer het egter 'n stokkie daarvoor gestee. Reën en mis is maar altyd 'n probleem wanneer die Drakensberg en die Middelande van KwaZulu-Natal besoek word. Wanneer daar sonskyn die dag is, moet die beste daarvan gemaak word. Asem is opgehou dat die reënweer sou opklaar sodat ons die Sanipas kon gaan uity (een van die redes waarom ons by Midmardam gaan kamp het).

'n Sonnige Maandagoggend 27 Oktober breek aan en 22 van die toerlede pak die reis na Sanipas, oor Underberg, aan. Ons vorder vinnig en daag vinniger by die grenspos op as wat ons verwag het. Die ander toerlede het in die tussentyd besienswaardighede op die ou Johannesburg-Durbanpad tussen Howick en Fort Nottingham besoek. Van die toerlede het selfs die gedenkteken gevind waar die eerste sweefvliegtuig in die wêreld gevlieg het - toe die Wright-broers nog op skool was. Dinsdag 28 Oktober is soortgelyke besoeke onderneem. Woensdag 29 Oktober het ons vroeg na Mountain Splendourwoonwapark in die Cathkinpiek gebied vertrek.

Een van die redes vir die besoek aan Mountain Splendourwoonwapark was dat sommige toerlede die laaste konsert van die Drakensbergse Seunskoor wou bywoon wat op Woensdag 29 Oktober gehou sou word.

Benewens die Drakensbergse Seunskoor wou van die toerlede ook die roofvoëlvertoning by Falcon Ridge bywoon. Die Sentrum bied roofvoëlvertonings elke dag behalwe Maandae en Vrydae aan indien die weer dit sou toelaat. Ons was gelukkig dat Donderdag 30 Oktober 'n helder sonskyndag was en die vertoning kon plaasvind.

Op Sondag 02 November het Pieter du Preez van Mountain Splendourwoonwapark, wat opgelei is as evangelis, die Kerkdiens gelei. Ons het met sy kitaarbegeleiding heerlik gesing. Daarna het ons na die ATKV Drakensvilleoord vertrek.

In die omgewing van Drakensville is daar heelwat plekke om te besoek. Daar is ondermeer besoeke aan die Amfiteater in die Koninklike Nasionale Park, die Retiefrots, Retiefpas, die

Kaalvoetvrou, Cathedralpiekgebied en die Spioenkopslagveld gebring. Een van die hoogtepunte was sekerlik die besoek aan die Hidro-elektriese Waterskema en kragstasie op die grens tussen KwaZulu-Natal en die Vrystaat. Met 'n puik gids soos Elias is baie van ons vrae beantwoord.

Te gou breek Sondag 09 November aan en het die grootste deel van die groep huiswaarts gekeer. Dis nie lekker om alleen agtergelaat te word en jou toermaats te sien vertrek nie. Aangesien ek en Hettie tans geen huis het nie, het ons maar besluit om nog twee weke by Drakensville oor te staan. Die lewe is maar ook nie aldag maklik nie, of hoe?

Sawa en toergroete

Frank & Hettie Smith

Toerleiers




Rietvallei Streek lede wat die toer meegemaak het.

Vlnr: Tertia en Tinus Fourie, Roekie en Henry Hill en Ben en Alta van Eeden

Volgens Henry en Roekie Hill was hierdie vir hulle die hoogtepunte van die toer:

- Die natuur wat die beste in RSA is;
- Besoek na Sanipas;
- Eskom Kragstasie wat 52 verdiepings onder grond is;
- Royal National Park;
- Cathedral Park;
- Little Switzerland;
- Eagle training and saving of the Eagles (sentrum);
- Drakensberg Seuns koor;
- Piet Retief Klip; en
- "Chinne" makers en mense wat unieke tipe skilderwerk doen.



Met dank aan Henry en Roekie Hill vir die foto's!